

Industri pembuatan beroperasi pada kapasiti lebih rendah

Industri pembuatan beroperasi pada kapasiti 79.8 peratus pada suku keempat 2023, berkurang 0.4 mata peratus berbanding kadar 80.2 peratus pada suku keempat 2022, demikian menurut Jabatan Perangkaan Malaysia (DOSM).

Ketua Perangkawan Malaysia, Datuk Seri Dr Mohd Uzir Mahidin, berkata kapasiti penggunaan yang lebih rendah dalam industri pembuatan disebabkan terutama oleh penurunan dalam subsektor produk petroleum, kimia, getah & plastik (-4.2 mata peratus) dan produk peralatan elektrik & elektronik (-0.5 mata peratus).

"Sebaliknya, kapasiti penggunaan industri pembuatan meningkat berbanding 79.4 peratus yang direkodkan pada suku tahun sebelumnya, meneruskan trend positif bagi dua suku tahun berturut-turut," katanya dalam satu kenyataan.

Mohd Uzir berkata, secara bulanan, kadar penggunaan dalam industri pembuatan melebihi 80 peratus bagi dua bulan berturut-turut, beroperasi pada 80.4 peratus dalam bulan Oktober 2023 dan 80.1 peratus pada bulan November 2023.

Namun begitu, katanya kadar kapasiti penggunaan pada bulan Disember 2023 menurun kepada 78.9 peratus.

Beliau menjelaskan, penurunan kadar kapasiti penggunaan pada suku keempat 2023 ini sejajar dengan trend Indeks Pengeluaran Industri Pembuatan yang menyusut 0.2 peratus.

"Pengurangan kadar kapasiti pengeluaran adalah dipengaruhi terutama oleh permintaan yang rendah, bekalan bahan yang tidak mencukupi serta pembaikan dan penyelenggaraan mesin & peralatan," katanya.

Mohd Uzir berkata, terdapat lima subsektor yang merekodkan kadar kapasiti penggunaan melebihi 80 peratus pada suku keempat 2023.

"Kadar tertinggi iaitu 83.2 peratus adalah direkodkan dalam subsektor pembuatan produk mineral bukan logam, logam asas & produk logam yang direka dengan menunjukkan peningkatan 4.5 mata peratus tahun ke tahun.

"Ini diikuti oleh kelengkapan pengangkutan & pembuatan lain dengan 82.2 peratus. Sementara itu, subsektor pembuatan petroleum, kimia, getah & plastik beroperasi pada kapasiti penggunaan rendah dengan 77.9 peratus, berkurang 4.2 mata peratus," katanya.